

17 JUN 1996

PRESIDEN UMNO BERI INGATAN JANGAN GUNA JENTERA KERAJAAN

KUALA LUMPUR, 17 Jun (Bernama) -- Semua anggota UMNO yang memegang jawatan dalam kerajaan sekali lagi diingatkan supaya tidak menggunakan jentera kerajaan dalam kempen menjelang pemilihan jawatan parti itu Oktober depan.

Perdana Menteri Datuk Seri Dr Mahathir Mohamad selaku Presiden UMNO memberi ingatan itu melalui surat yang diedarkan kepada Menteri Besar, Ketua Menteri, Menteri Kabinet, Timbalan Menteri dan Setiausaha Parlimen, minggu lepas.

Dalam surat itu Dr Mahathir meminta semua pihak patuh kepada arahan itu.

Ini selaras dengan keputusan Majlis Tertinggi (MT) mengenai perkara itu demi menjamin keutuhan parti serta keadilan pada pemilihan itu.

Mereka yang bertanding pada pemilihan itu nanti akan hanya boleh berkempen mulai 1 Ogos.

Beberapa Menteri kabinet, Timbalan Menteri dan Setiausaha Parlimen yang dihubungi mengesahkan yang mereka telah menerima surat itu. -- BERNAMA

HS NMO